

Sukarelawan UniMAP, UUM kerjasama salur kepakaran bantu mangsa banjir

WAN MOHD NOOR HAFIZ WAN MANSOR 13 Disember 2024 03:05pm Masa membaca: 2 minit



Zaliman (tengah) semasa turun padang bersama skuad Sentuhan Kasih Pasca Banjir UniMAP-UUM di Taman Tabung Haji, Alor Setar pada Khamis. FOTO UNIMAP

JITRA - Lebih 200 sukarelawan Universiti Malaysia Perlis (UniMAP) dan Universiti Utara Malaysia (UUM) turun padang membersihkan rumah dan pusat komuniti di Taman Tabung Haji, di sini yang terkesan akibat banjir baru-baru ini.

Hampir 90 peratus rumah di taman tersebut ditenggelami air dengan anggaran kerugian mencecah jutaan ringgit.

Menurut Naib Canselor UniMAP, Profesor Datuk Dr Zaliman Sauli berkata, universiti berkenaan dan UUM telah menghantar bantuan melalui skuad Sentuhan Kasih Pasca Banjir UniMAP-UUM untuk mengurangkan beban penduduk.

"Selain mencuci rumah, dewan masyarakat, surau dan tadika, UniMAP juga menghantar sukarelawan penyelidik dalam kalangan pelajar dan pensyarah yang berkepakaran dalam bidang elektrik dan elektronik.

"Mereka melakukan pendawaian elektrik dan membaiki barangan seperti penghawa dingin di pusat komuniti yang tenggelam memusnahkan hampir keseluruhan barangan di dalamnya," katanya pada Khamis.

Hadir sama Ahli Lembaga Pengarah Lembaga Kemajuan Wilayah Kedah (Keda), Datuk Aminuddin Omar; Timbalan Naib Canselor (Hal Ehwal Pelajar dan Alumni) UniMAP, Profesor Dr Mohd Mustafa Al Bakri Abdullah dan Pengarah Jabatan Hal Ehwal Pelajar, Muhammad Iskandar Zulkarnain Muhammad Suhaimi yang juga Ketua Sukarelawan Skwad Sentuhan Kasih Pasca Banjir UUM.

Jelas Zaliman, antara aktiviti yang turut dilakukan untuk meringankan beban mangsa banjir adalah mengecat, pembaikan perabot, penukaran minyak enjin motosikal, dan pemeriksaan kesihatan percuma.



Lebih 200 sukarelawan UniMAP dan UUM turun padang membersihkan rumah dan pusat komuniti di Taman Tabung Haji, Alor Setar pada Khamis. FOTO UNIMAP

Menurutnya, program ini melibatkan penyertaan aktif sukarelawan dari seluruh UniMAP, yang merangkumi wakil daripada semua fakulti.

"Setiap fakulti memainkan peranan penting dengan menyumbangkan kepakaran unik mereka, memastikan pelaksanaan program ini berjalan lancar dan memberi impak positif kepada masyarakat," ujarnya.

Tambahnya, peruntukan untuk program ini diperoleh sepenuhnya hasil daripada sumbangan ikhlas dan komitmen tinggi staf di setiap fakulti.

Zaliman memberitahu, UniMAP bersedia untuk menyalurkan sebarang bentuk bantuan yang diperlukan oleh masyarakat yang terjejas akibat banjir ini

"Melalui kutipan di UniMAP, kami turut menyumbang katil kepada pesakit terlantar dan barangan asas dapur seperti beras dan gula."

"Kami di UniMAP dan UUM berharap agar sumbangan dan bantuan yang diberikan ini dapat mengurangkan bebanan yang ditanggung oleh warga taman," katanya lagi.